



REPUBLIKA E SHQIPËRISË

MINISTRIA E DREJTËSISË



TERRE DES HOMMES



Aide à l'enfance. | Helping children worldwide.

Nr. 1147 prot.

Tiranë, më 20.11.2018

Nr. 34 prot.

Tiranë, më 20.11.2018

MARRËVESHJE BASHKËPUNIMI

NDËRMJET

MINISTRISË SË DREJTËSISË

DHE

TERRE DES HOMMES

Për implementimin e qasjeve dhe teknikave restauruese për të miturit dhe të rinjtë në kontakt me ligjin

Preambul:

Ministria e Drejtësisë dhe Organizata Terre des Hommes, në vijim të quajtura *Palë*:

Duke vlerësuar rëndësinë e përmirësimit të administrimit të drejtësisë penale për të miturit në konflikt me ligjin në kuadër të forcimit të shtetit të së drejtës dhe përmirësimit të respektimit të drejtave të njeriut;

Duke marrë në konsideratë politikat e ndjekura dhe masat e ndërmarra në nivel legjislativ për të mbrojtur dhe garantuar të drejtat e të miturve në konflikt me ligjin dhe kërkesat për implementimin e suksesshëm të tyre;

Duke synuar implementimin efektiv të ligjit nr. 37/2017, datë 30.03.2017 “Kodi i Drejtësisë Penale për të Mitur” nëpërmjet prezantimit të teknikave restauruese për të rinjtë në konflikt me ligjin, teknika inovative në kontekstin shqiptar;

Duke konsideruar se për të kontribuar në respektimin e të drejtave të njeriut, veçanërisht të fëmijëve e të rinjve në konflikt ose në kontakt me ligjin është e domosdoshme nxitja e zbatimit të qasjeve restauruese të drejtësisë;

Duke njohur ekspertizën dhe njohuritë institucionale të organizatës “Terre des hommes” për ndërtimin dhe forcimin e një sistemi të integruar të mbrojtjes së fëmijëve, në përmirësimin dhe zbatimin e drejtësisë për të mitur dhe praktikave restauruese, si dhe parandalimin e ekstremizmit të dhunshëm përmes rritjes së reziliencës së të rinjve dhe familjeve të tyre, si dhe burimet teknike dhe financiare të investuara në këtë fushë në Shqipëri;

Duke njohur kontributin e organizatës “Terre des hommes” në zhvillimin e sundimit të ligjit përmes përmirësimit dhe advokimit për zbatimin e të drejtave të fëmijëve në sistemin e mbrojtjes së fëmijëve dhe atë të drejtësisë për fëmijët në konflikt me ligjin mbi dhe nën moshën për përgjegjësi penale dhe zbatimit të modeleve re-integruese dhe rehabilituese.

Duke konfirmuar vullnetin dhe vendosmërinë për të bashkëpunuar dhe kontribuar në realizimin e qëllimit të kësaj marrëveshje për të përmbushur angazhimet e ndërmarra në kuadër të përmirësimit të drejtësisë penale për të mitur dhe të rinjtë;

Kanë rënë dakord të lidhin këtë Marrëveshje Bashkëpunimi, në vijim e quajtur *Marrëveshje*.

Neni 1

Qëllimi

Marrëveshja ka për qëllim institucionalizimin e bashkëpunimit dhe përcaktimin e angazhimeve ndërmjet palëve:

- i) për arritjen e objektivave dhe zbatimin e aktiviteteve që synojnë implementimin e qasjeve dhe të teknikave restauruese për të miturit dhe të rinjtë në kontakt me ligjin,
- ii) mbështetjen në hartimin e dispozitave ligjore dhe /ose protokolleve të punës për trajtimin e të miturve nën moshën e përgjegjësisë penale dhe drejtësisë restauruese;
- iii) forcimin e kapaciteteve të profesionistëve që punojnë me të miturit dhe të rinjtë në kontakt me ligjin;
- iv) në promovimin e modeleve për parandalimin e ekstremizmit të dhunshëm tek të miturit dhe të rinjtë.

Neni 2

Objekti

Palët në përputhje me prioritetet e veprimtarisë së tyre bien dakord të bashkëpunojnë:

- i) për vënien në zbatim të aktiviteteve dhe iniciativave të programuara të drejtësisë restauruese për të miturit dhe të rinjtë në kontakt me ligjin;
- ii) në forcimin e drejtësisë miqësore për të mitur dhe të rinjtë në konflikt me ligjin me fokus të posaçëm rehabilitimin dhe parandalimin e recidivizmit dhe zbatimin efektiv të detyrimeve të parashikuara në masën e shmangies nga ndjekja penale për përfshirjen në programet e drejtësisë restauruese dhe ndërmjetësimi;
- iii) në forcimin e kapaciteteve të profesionistëve të drejtësisë për të mitur të fushës sociale dhe psikologjike, në teknikat e sjelljes dhe veprimeve me të rinjtë dhe me të miturit mbi dhe nën moshën për përgjegjësi penale ose në rrezik të përfshirjes në veprimtari të dëmshme, me synimin e promovimit dhe garantimit të qasjeve restauruese;
- iv) në hartimin e studimeve, analizave, protokolleve zbatuese dhe akteve të nevojshme për organizimin dhe funksionimin e mekanizmave të mbrojtjes së sistemit të drejtësisë restauruese;

- v) në forcimin e njohurive dhe ekspertizës në luftën kundër ekstremizmit të dhunshëm përmes studimit të kushteve, faktorëve dhe nxitësve të radikalizmit në dhunë, ndarjes së informacionit, praktikave dhe përvojave më të mira për t'iu kundërpërgjigjur ekstremizmit të dhunshëm në të gjitha format e tij.

Neni 3

Detyrimet e Palëve

Secila nga Palët sipas fushës së veprimtarisë së tyre kanë detyrimet e mëposhtme:

a) Ministria e Drejtësisë:

- i. koordinon dhe lehtëson bashkëpunimin me institucionet e varësisë për zbatimin e aktiviteteve të drejtësisë restauruese;
- ii. nxit dhe mbështet bashkëpunimin e organizatës Terre des hommes me institucionet kompetente në hartimin e kurrikulave dhe zhvillimin e trajnimeve me qëllim përfshirjen në programet e tyre të tematikeve që lidhen me drejtësinë restauruese;
- iii. përfshin në grupet e punës dhe në rrjetin ndërinstitucional të punës për drejtësinë për të mitur përfaqësues të Organizatës Terre des hommes;

b) Organizata Terre des hommes:

- i. ofron mbështetje teknike dhe financiare për zbatimin me sukses të objektivave dhe aktiviteteve të rëna dakort në këtë Marrëveshje Bashkëpunimi;
- ii. vë në dispozicion materialet burimore, module trajnimi, staf me ekspertizë për hartimin e metodologjisë dhe mjeteve të punës për arritjen e objektivave që ka marrëveshja;
- iii. ofrimin e ekspertizës nga partnerët e saj vendas dhe konsulencën e huaj në hartimin e praktikave, protokolleve dhe skemave për zbatimin e qasjeve restauruese;
- iv. ofrimin e asistencës për hartimin e kurrikulave dhe zhvillimin e trajnimeve për rritjen e kapaciteteve të profesionistëve drejtësisë penale për të mitur për programet e drejtësisë restauruese.

Neni 4

Vlerësimi i zbatimit të Marrëveshjes

1. Palët marrin përsipër të vlerësojnë bashkërisht funksionimin e bashkëpunimit në mbështetje të Marrëveshjes nëpërmjet hartimit dhe paraqitjes së raporteve periodike, çdo 6 muaj, me shkrim pranë titullarëve të të Palëve.
2. Raporti periodik përmban, krahas të dhënave për mënyrën e zbatimit të Marrëveshjes, edhe rekomandimet konkrete për adresimin e problematikave të evidentuara.

Neni 5

Komunikimi mes Palëve

1. Palët angazhohen të mbajnë një komunikim të vazhdueshëm ndërmjet tyre dhe të shkëmbejnë çdo informacion të nevojshëm për përmbushjen e detyrave të tyre. Komunikimi do të kryhet në formë shkresore dhe në raste të veçanta edhe në rrugë elektronike.
2. Palët do të caktojnë personat e kontaktit që do të jenë përgjegjës për shkëmbimin e informacionit dhe plotësimin e kërkesave të tyre në zbatim të Marrëveshjes;
3. Personat e kontaktit nga të dyja palët do të jenë të disponueshëm në çdo kohë për komunikimin dhe koordinimin me qëllim rakordimin e veprimeve që duhet të ndërmerren rast pas rasti.

Neni 6

Kohëzgjatja e Marrëveshjes

Kjo Marrëveshje zbatohet për periudhën Nëntor 2018 – Qershor 2021.

Neni 7

Ndryshimi i Marrëveshjes

Kjo Marrëveshje mund të ndryshojë vetëm me marrëveshje të palëve nëpërmjet shkëmbimit të komunikimit me shkrim.

Neni 8

Zgjidhja e mosmarrëveshjeve

Çdo mosmarrëveshje lidhur me interpretimin ose zbatimin e kësaj Marrëveshjeje zgjidhet me mirëkuptim mes palëve.

Neni 9

Kostot financiare

Kostot financiare të aktiviteteve që do të kryhen në kuadër të zbatimit të Marrëveshjes do të mbulohen nga Organizata Terre des hommes.

Neni 10

Hyrja në Fuqi

Marrëveshja hyn në fuqi në datën e nënshkrimit dhe publikohet në faqet zyrtare të Palëve.

Marrëveshja përgatitet dhe nënshkruhet në 4 (katër) kopje origjinale, dy prej të cilave depozitohen në Ministrinë e Drejtësisë.

Nënshkruar në Tiranë, në 20.11.2018.

PËR

PËR

MINISTRINË E DREJTËSISË

TERRE DES HOMMES

MINISTRI

DREJTORE E MISIONIT


Etilda Gjona (Saliu)



Jezerca Tigani

